

回風堂詩文集

PL  
2708  
.E6  
v.3



JUL 03 2001

EAST ASIAN STUDIES

Digitized by the Internet Archive  
in 2010 with funding from  
York University Libraries







JUL 03 2001

EAST ASIAN STUDIES

四風堂詩文集

朱孝威





回風堂詩文集序

自余出里塾游鄉校聞有馮某者好古而善讀書年甚少材甚美爲文章上規漢魏儼然見法度嘗就書院試某賦主者疑之以爲非今人有也時余初返儒服學爲文孜孜盡日之力不能得百字雖甚慕君而不敢言友也越數歲始交魏仲車仲車極誇余詩于應悔復得識悔復爲友悔復與君時所稱爲吾邑二隽者也余因悔復乃復交君久之益習又各以孤童子自奮於學涼涼之行旣無不同遂益相憐重稱莫逆中歲以還吾兩人講學甬水上日多所居處又甚邇朝相切而夕相磋一



日不見則訝爲困眚纏恙用相揣度必見而後始慰有所作必互出爲眎有疵則相滌有善則相益其於行也亦然無一事不以相聞雖隱約難言者亦爲告也及余來滬上君亦遷館旋至浮湛十年間聲氣日以廣名聞日以高四方績學之士苟至於滬者靡不求交于君謂君情性厚有道義不唯多君文也十六年春余奉委襄政杭州始與君別然每公閒休沐必就滬省君四年中君亦兩至杭州視余嘗語余耄脩勿怠勿貪一日之祿而隳百年之業余亦以生平著作爲規君愀然曰爲貧故而粥文發篋夥沈沈非不高且美矣然遂欲流眎後

人豈吾意耶子知我乎吾于辭去取皆有識無識者雖  
辭可存而義不可有異日者不幸先子死子必爲我勤  
此願以是屬嗟乎儲吾胸者吾不及吐而吐者又非吾  
所意士窮無所藉于手卽此區區者尙不能完其願則  
所謂立言不朽者何如哉余數聞君言如此因深慨君  
何志之悲而衰之速也然猶私幸君神明湛然意氣甚  
盛每晤對終日無厭態則意以爲我兩人相與當可數  
年或十數年未必遽棄而孰知不能也一別之頃竟成  
終古天耶命耶斯文之喪耶悼伊人之不復覩遺編而  
愴然追摹曩昔之言哀音宛宛猶未絕乎吾耳而清容



渺矣傷哉傷哉當君疾大漸時余聞而赴省則口已不能言見余至目相眴不已出手握余臂牢不放者移時始棄余背而睡若有萬言語欲傾結於喉而不克盡者然意殊恨已余念君生平無悖於天無忤于人死何恨所恨恨者其惟此畢生心血之所假焉者乎嗚呼君雖不言吾知之矣因屬君子胥取君詩文諸稿循所識而寫定之得文八十首詩五百四十六首編次之爲十四卷君夫人俞因婦學齋遺稿附焉旣藏事余當爲敘乃取余兩人相與之深及君當日垂死目囑之情百書之而莫盡也若夫君之辭之品第則固如嚮者主司之所



疑謂非今人有者其高尚可知矣余不復贊一詞二十  
一年三月陳訓正



回風堂詩序

余友陳无邪以書來告曰君木病甚矣有詩數百篇皆手錄者亟付予惟君序之君木念子深毋忘也余愴然以君木發動舊風體清羸而耆苦吟每勸語之而不余聽儻竟失此人耶冬余渡江視君木乃幸無恙要余宿其家回風堂時雪月初霽寒光照屋壁吾兩人倚爐吟詠達夜分其意興未衰君木若未嘗病也君木无邪皆慈谿人慈谿與吾縣近吾少聞陳馮之名後遂相遇與交密前年余館甬上二君亦以避亂寓郡城吾每與君木訪无邪遊城北後樂園爲詩酒之會吾不善詩二君



喜以詩相視无邪嘗欲有爲亂後意有所不樂故其詩多幽沈鬱宕之音君木意量翛然雖居困而有以自得故其詩有蕭曠高寒之韻要皆吾甬上詩人之絕出者也君木始以高才爲麗水校官輒棄去歸隱乃與无邪唱和壹志於詩謂方病時負痛呻吟他皆不省猶喜人談詩若吾藉此而魂魄無憾者嗟乎君木殆欲以詩託命也耶余爲序之亦以慰君木之意於無窮也丁巳三月鎮海虞輝祖

慈谿馮先生行狀



先生諱升字君木浙江慈谿人也吳越建國有叔和者  
自婺來徙卅有二世以至先生曾祖應翥祖夢香候選  
典史兩世皆贈朝議大夫考允騏國學生贈修職郎累  
代清郁光聞邦邑先生生有嘉表聰遠韶純羣經百氏  
遇目能識文辭爛然若有天授方十五六故已犖犖有  
奇節矣年二十補縣學生旋食廩膳光緒二十三年選  
拔貢生朝考二等吏部詢問願就教職補用教諭出爲  
麗水縣學訓導興文教修學宮士議繫歸留之一載調  
任宣平縣學教諭以病不赴雅懷恬介不樂仕進三十

而後卽棲遲邑里結志墳典蕭條高寄不以時務經懷  
與同縣陳鏡堂晉卿鄭光祖念若馮毓孳汲蒙陳訓正  
無邪應啓墀叔申錢保杭仲濟魏友枋仲車姚壽祁貞  
伯諸子爲剡社日月要晤會文輔仁一時谿上號多士  
焉先生於學無術不綜廣稽約守包括道要不爲門戶  
異同之論文章淵雅尙規魏晉言典致博造次必爾蓋  
自文筆別塗不相合謀騁辭華者日靡於繇富矜渚淨  
者并遺其風骨先生假長補短獨主體氣剝散浮華歸  
於簡朗用能巧不傷理雋不害道安聃審固情采俱茂  
可謂修辭立誠文質份份者也蚤歲孤露孝奉慈母而



體仁愛人無間戚疏其交友也不以貧富易操不以死  
生殊節家故不豐自奉甚約至於親類急難毫老癯病  
稱力存拯唯恐不及少年承學善誘善導薄媵片能輒  
稱譽勿置先博其趣然後勉進藝業故弟子敬愛先生  
猶敬愛其父兄也晚更離亂旅食上海並世名宿多所  
通接若吳興朱祖謀古微桂林況周頤夔笙長沙程頌  
萬子大安吉吳俊卿昌碩興化李詳審言胥服其文重  
其行軒蓋還往驩若平生況吳前卒皆有遺言必先生  
銘其墓云春秋五十有九以中華民國二十年五月十  
八日告終上海寓次自冬涉夏寢疾數月俚曹候視趾

錯於庭或通宵留侍未忍違去比其歿也皆揮涕失聲  
哀不自勝設位會哭動數百人自非該行備德內修于  
己夫孰能感孚儔類若是其至者乎遺箸有回風堂文  
若干卷詩若干卷詞一卷札記若干卷雜箸若干種皆  
未刊元妃俞孺人因字季則有婦學齋詞一卷繼妃陳  
孺人李孺人子男二貞胥貞用女一貞俞孫男女各一  
人文若受知先生既深且夙甄述景行責無旁貸重以  
顧命所及承命祇懼薄言最敘忘其愚弁後之君子以  
觀覽焉二十年八月門人沙文若謹狀

慈谿馮君墓志銘

義寧陳三立撰

馮君諱升字君木浙江慈谿人曾祖諱應翥祖諱夢香  
考諱允騏少孤從母俞受詩上姿天挺不督而成年十  
五六已斐然有著作意二十補諸生旋食廩餼光緒丁  
酉以拔貢試於朝列二等故事當得知縣君自言銓曹  
願爲儒官授麗水縣學訓導居一歲調宣平縣學教諭  
辭疾不赴年甫三十歸不復出篤意書史廣覽博涉擷  
菁含英包孕典略故其爲文華實相資麗則以適匣鏐  
毀銓與爲優游詩出入杜韓黃陳醞釀萬有鎔冶以情  
性兼工倚聲嘗與同邑陳鏡塘諸子結剡社用道義術



業相切廟晚客上海四方承學之士問業者踵至析義  
答難竭情無隱誘掖後進因材曲成所造就甚衆與人  
交隆久要之誼雖居貧未嘗不急人之急也不翕翕聲  
氣而耆儒宿學年少才俊咸樂與游安吉吳昌碩吳興  
朱孝臧桂林況周頤寧鄉程頌萬興化李詳交尤篤不  
幸得疾以辛未四月二日卒旅次年五十有九所著有  
回風堂文若干卷詩若干卷詞一卷日記若干卷雜著  
若干種藏於家初娶俞再娶陳三娶李子貞胥貞用女  
貞俞孫男女各二方君寢疾門弟子日夜走視不絕有  
留侍達旦者既歿皆哭失聲遠近會弔者數百人其孤

將以甲戌八月二日葬君西嶼鄉上午里之原以君友人陳訓正所爲述門人童第德沙文若所爲傳狀來徵銘乃序而銘之銘曰

窮一世而無所覲兮惟斯文之是耽慕前修之隆軌兮掉六轡與驂驪謂今之人莫子知兮休聲溢虔江之南名不朽其可願兮偃大室而長酣





回風堂詩目次

前錄卷一

古今體詩九十首

前錄卷二

古今體詩六十六首

卷之一

古今體詩六十五首

卷之二

古今體詩六十九首

卷之三

古今體詩三十三首

卷之四

古今體詩五十一首

卷之五

古今體詩四十七首

卷之六

古今體詩三十六首

卷之七

古今體詩八十九首

右詩都五百四十六首

回風堂詩前錄卷一

慈谿馮并君木

題夏內史集戊子

家國悵悵百感深南冠憔悴有商音  
大哀雪涕思江表野哭吞聲到細林  
慘淡干戈消玉貌亂離文字出童心  
終軍慧悟汪錡烈躑躑雲間淚滿襟

松江憶家園桂花

團團桂之樹寂寂有清陰夢裏空花繞  
天涯客思深馨香懷故宇婉孌感秋心  
回首留人處端居發苦吟

締交篇贈應啓墀



大易筮盍簪小雅賡伐木人生重交道寧論骨與肉髻  
髮涉學林汲汲求其族嚶鳴豈不聞鳬雀紛追逐粲粲  
窈窕子媿媿絜修沐鬱鬱蕙蘭抱隨風揚清馥大海吹  
浮萍邂逅城西屋揖我謂我臧燕婉展昏夙嘿契照淵  
衷嘉言抒深蓄臭味相聃合各各自歡足穉歲同里閨  
行止夙乖局三年淞水游塗軌間川陸玄鶴矯曾雲丹  
鸞翔穹谷光儀亦匪遠脈脈感靈獨幸茲接款睇繾綣  
託心腹贈我瑤華篇報子瓊茅束河水何盤盤山石何  
轟轟相期永勿諼努力保金玉

客夜壬辰

寂寥抱影坐殘燈獨夜情懷遣未能狹徑秋深風走葉  
短廊人靜月扶藤詩心冷似荒龕佛酒味枯於退院僧  
角枕繩床誰與處無眠祇覺客愁增

明珠歎癸巳

我有雙明珠寶光森璆琳緣之紫絲纈欲以遺同心勞  
燕各分離同心不可期暗投寧不惜善價當求誰明珠  
復明珠乃與魚目俱擣珠作珠粉一任淪泥塗

過大七洋

不斷黃流浩有聲四天如冪暮雲平絕無依傍孤舟度  
對此蒼茫百感生涉世從知風浪惡重名敢悔別離輕

祇愁燈火中宵夢莫慰高堂輾轉情

雨夜上海旅店

悲笳起寒堞落葉入匡牀孤館自秋雨一燈非故鄉排  
愁成寂莫存想到蒼茫展轉渾無寐生憎此夜長

申江候潮

潮落舟低聞天空月下城笙歌兩岸雨燈火一江晴亦  
覺此間樂難爲遙夜情思鄉清不寐明發又長征

秋夜病中寄內時客杭州

郵鼓沈沈夜正長昏燈短榻自淒涼情無可遣惟孤坐  
病已難堪況異鄉藥裹生涯憐我慣剪刀愁味累君嘗



家山一夕秋風起尺素相思好寄將

哭六兄蓮青鴻薰

嚴霜當夏零白日忽晝墜曹騰天壤間乃有今日事四海此弟兄惘然致憐愛平生緜眇情固結到肝肺短短手足緣一絕不復綴後死賸予影飄蕩在人世剗腸腸已裂剗心心都碎彌天積奇痛欲哭轉無淚

雨夜錄別甲午

隔幕春寒入畫櫺小軒向晚一燈青可憐如此瀟瀟雨今夜空江獨自聽

聽歌

水閣風涼夕掩窗  
蜃膏漸欲燼銀釭  
酒闌聽罷吳娘曲  
一夜歸心滿大江

清明寄應叔申啟輝

春光不覺已如許  
細雨無端還復晴  
客子何心折楊柳  
故園今日是清明  
惟將濁酒酬佳節  
亦有新詩寄友生  
苦憶湖隄好光景  
獨堪留滯在江城

重建清道觀落成

一覽蒼茫生鬱陶  
樓臺橫插天高高  
燈火千樹萬樹月  
鼓鐘前山後山濤  
奇構天然非人力  
後時清興屬我曹  
仙夫窈窕不可訪  
雲窗霧閣吾其遨

聞姚貞伯壽祁將來郡賦詩促之

不見姚生行半載  
大江如此肯來游  
出門時復一瞻望  
有酒足堪供唱酬  
今日何日天晶晶  
待來不來心悠悠  
大佳光景那可失  
庭外爛開紅石榴

月夜

灩灩晶簾靜不波  
玉人消息隔明河  
斷雲幾尺碧天闊  
愁倚露臺寒奈何

拂袖霜華漸欲凝  
雁聲遙夜逼疏燈  
家山一樣明明月  
可也今宵眠不能

感春三章乙未



堂上擊鼓羅酒漿堂下磨刀烹肥羊衆嫖淖約侍兩廂  
金鵝翠雀翻以翔陽春一歲一回至能令萬物增輝光  
眼底牡丹大如斗辛夸瓏瓏出地長千歡萬悅陳樂方  
天暉日晏芬茫茫如此芳時不沈醉寧待屋頂生白楊  
弱歲宛宛嗟無徒伯歌季舞情不孤如出唾沫相啣濡  
沙渾之樂成江湖一夕荆枝感搖落悼傷直欲亡其軀  
緜緜哀思白日徂廿年骨肉真須臾春風昨夜回庭除  
吹噓羣悴澤衆枯胸中噫氣慘不蘇照眼紅綠生煩紆  
左陳千榼右百觚舉酒欲酬神已逋人生作達良不易  
但有淚落增悲吁

海東烽火照天徹日射扶桑赤成血居庸關外柳條青  
十丈春風過飄瞥將軍意氣涌如山虜在目中期必滅  
于思棄甲終一跌坐使林花笑人拙憂來無方不可說  
側身東望氣先結衆芳爛漫誰與擷日暮空山聽啼鴉

### 山游

一雨羣峯曙光姿晶林木剔邃恣僑思掠迴晰奇矚學  
學躋冢頂怪噩顫心肉壑黝墟虎牙嶂扈亢龍腹峻塗  
阼窆湫仄步難駢足蹙石駭一蹶驚魂墮荒瀑破險出  
夸坦背脊翦複陸溪羽振潛響巖葩扇孤馥攫果狀猱  
升吸泉肖鼠伏跌宕縱嬉戲狂呼雜笑哭赭日儵帶翳

征公習迴躅浩譟洩天喙獮飈旬厓谷

將之上海留別叔申貞伯諸子

鹿鹿琴書意興闌終年飄墜總無端親衰幸有窮交在  
世亂真成慙別難海上烽煙愁路險山中猿鶴笑盟寒  
傷離感事無多淚灑向征衫不忍看

出鎮海關

形勝東南亦壯哉旌旗四照海門開議兵不是書生事  
天水荒荒獨舉杯

春草一首寄魏仲車友枋

迢迢驛路傷心極冉冉春光滿眼生日暮汀洲采蘭芷



天涯風雨忽清明馬頭殘笛征夫怨夢裏青山故國城  
當作佳人袍影看綠波咫尺若爲情

塞上曲

塞草西風颯颯號傳聞胡馬過臨洮將軍自有安邊策  
落月營門夜會高

聽歌

芳樹東西映綺筵清歌一曲惜嬋娟四條絃子渾無賴  
觸撥閒愁到酒邊

題秋影樓圖

老蟾照破暝天碧素漢明鱗盪斜白花宮漏低露腳沈

濃睡雌鸚窺涼夕靈麻雙燭珊枝紅簾晶一翦冰瓏瓏  
穉桐瘦盡攢蘅老貼地秋心煙夢中

寄應三兄

天涯思子曰爲勞回首鄉關心鬱陶聽罷鼓鼙夜無寐  
障川門外月高高

湖上偶成

箏琶粉閣夢成塵斜日晴川草不春一席水天閒話罷  
青山黯似別離人

叔申以詩見贈有庸者不識識者忌那況忌者正  
不多之句感其意之至而不能無惜其詞之過也

輒依韻畲之

男兒生不能渴飲生獐累斗血沙場躍馬橫金戈猶當  
排蕩雄心鑿墳索蹙蹋顏謝鞭陰何嗟余僕邀局尋丈  
肝腎役役窮鎚磨語言譎誕呀河漢杜老哈笑昌黎訶  
年年流轉塵土底時出涕淚供吟哦苦無一物酬世好  
世人憎我寧云苛文章光氣亦不媚但有兀兀助轆軻  
本無可識何況忌扼腕太息君則那爲君拂衣一舞垂  
手羅大風塵沙轟醉歌青天如盆壓頭坐酒瓢一日千  
回摩

戲成



四庫全書  
詞部  
晶簾涼重曉梳頭兩兩眉痕若有愁  
兜臂鬟雲攏不起  
鏡花吹上一肩秋

約略

疏星幾點隔花黃  
約略珎窗曙色涼  
鬟影衣香兩飄瞥  
曉燈籠夢翦秋棠

小游仙詩

碧城十二倚瑤天  
天半闌干隔眇緜  
一口唾花吹不散  
濛濛下界作秋煙

窈窕紅牆界鈿雲  
零星仙語夜深聞  
玉清昨日飛靈詔  
勅駕青龍接太君

碎蹋桃花到上清  
斷霞縹眇暮寒生  
褰裳醉倚青鸞尾  
天外泠泠飛玉笙

洞口緋桃一笑差  
靈飛無咒辟魔邪  
朱凰銜到瑤清勅  
謫向羅浮掃落花

環天雜曲隔花聽  
高下珠筵酒不停  
日暮何須傳蠟燭  
停雲明拂四簷星

榆梢黃月拓明奩  
葉葉銖衣薄不嫌  
手得玉琅玕一尺  
銀河清淺釣靈蟾

讀張麟洲大令翊儔見山樓遺詩題後

生平不識張明府  
讀到遺詩忽惘然  
百首兵戈悲亂世

一官飄泊感中年文章落落推先輩簿領勞勞惜此賢  
斬與方干傳絕業故應賈恨到重泉張君弟子王孝廉  
定祥方謀付刻未舉而孝廉歿

秋夜懷魏二秀才友枋

疎雨晚方霽碧天清若流樓臺上明月燈火見新秋薄  
酌不成醉微吟如欲愁停杯念之子心上一綢繆

多病

偃臥誰相問高齋百感新雨風秋與至燈火曉還親書  
卷供多病窮愁歿此身奮飛苦無計嗟爾少年人

琴心



琴心咫尺感迢迢一宿高樓自寂寥  
恰恰人天清夢醒  
闌更疏雨又今宵

大寶山弔朱將軍貴

四山荒荒黯陣雲赭日下覆天爲曛  
殘鏃拾盡戰骨白  
行人猶說朱將軍將軍毅勇世無抗  
刁斗森嚴資保障  
食肉虎頭雄顧盼裹屍馬革端蘄嚮  
夷氛慘澹橫明州  
狼烽直壓句山頭靴刀慷慨誓滅此  
怒髮上指天雲秋  
九百健兒經百練天清野曠成酣戰  
士氣樓煩都辟易  
軍容回紇相驚眩惜哉彼衆我寡力  
不侔胡騎四合聲  
啾啾常山援絕顏忠節六陌軍孤周  
孝侯一鼓再鼓鼓

國風堂詩前錄卷一  
九  
聲竭盡敵不能還盡節死忠死孝各完分縣竹青溪同  
烈烈公子昭南從死叢祠一角荒山隈酌酒瞻仰空徘徊  
將軍英風安在哉夜深月黑魂歸來猶聞雲端鬼馬  
鳴聲哀

有贈

餐冰嚼雪未辭寒賣盡明珠計亦難不爲蛾眉怨謠詠  
一鋤殘淚種秋蘭

窈窕三章

窈窕青樓大道邊春陽晚晚惜嬋娟誰能朝暮看雲雨  
不信憂愁有陌阡天上白榆何歷歷江南蓮葉自田田

容華轉眼成銷歇吹罷參差一惘然

花花葉葉自相當夙昔芳菲滿室堂西北樓高空宛變  
東南日出有輝光夫君顏色思瓊樹下女心期在佩纓  
緘得瑤華難自致含愁竟夕織流黃

夫容采采下汀洲攬袂秋風涕泗流誰爲姬姜惜蕉萃  
我思公子有離憂繽紛琚佩修奇服寤寐鸞皇導遠游  
自是蛾眉召謠詠不須浩蕩怨靈脩

江皋一首贈章述洄

江皋多芳草日暮采蘭芷采采不盈掬所思在君子我  
昔睹君子盼睵生輝光葑菲不見遺願言爲弟兄嘉言



展昏旦婉變感中腸投我貂襜褕報之以明璫明璫何  
明明明明如滿月滿月有時虧寸心無圓缺

寄陳晉卿鏡堂

變彼雙飛鳥迴翔嘉樹林念我攜手好城闌間商參昔  
者展嘉會笳簫紛五音姱容備二八眇視送靈襟人事  
有新故芳華坐銷沉雨落不上天逝景難重尋願言保  
金玉無爲哀樂侵

贈陳天嬰訓正

入世巾袍憐我拙眼中人物見君賢聲名金玉期千古  
身世龍蛇負妙年寂莫閉關長頌酒荒唐呵壁欲箋天

繁憂獨抱無人識付與秋風作眇繇

歲暮

人間歲事各紛然老屋昏燈獨草玄  
弱冠文章違世譽酒尊歌哭逼殘年  
蓬蒿寂寂愁生地星月荒荒亂後天  
轉眼新春須作達昇平光景且流連

示兄女貞姪

吾家有道韞婉婉能知書輟紆弄柔翰  
煙墨紛展舒百篇漢魏詩洛誦無遺餘  
慧心發妙旨往往能起予吾昔髫髻日  
暱就汝父居支離問奇字嬉笑擊矜裾  
遙遙已十載忽忽思童初夜闌授汝簡  
泪落增欷歔

寄何明經其枚

嬋娟雲間月流輝散遙岑念我佳俠子  
排側傷靈襟揚靈隔大江曾瀾迴且深  
願言擷蕙草搖蕩悲回風繫余辭鄉甸  
幽獨匪自今高邱豈無女貌合難爲心  
潛鱗戀舊淵翔羽思故林衣緇不可澣  
首疾以欽欽

臥病

空堂百響絕蝙蝠動昏晨中有幽憂子  
臥病逾經旬經旬亦不久志士多苦辛  
坐令好景光棄我去踈踈睎彼穹霄鶚  
毛羽何璘玢長風九萬里上擊天池塵  
我生獨顛顚帖翼無由振浩歌不可輟  
咄咄呼洪鈞



七夕

潺湲玉露下庭柯  
倚罷參差發浩歌  
脈脈高樓又今夕  
迢迢天上此明河  
秋期宛變黃昏誤  
永夜嬋娟太息多  
月地雲階眇何所  
通辭誰爲託微波

慰仲車

魏郎三十好身手  
低首窮閭真苦辛  
懷抱能容五百輩  
心光直照三千春  
可憐兀兀有年歲  
無那依依傷賤貧  
一夜雨風動閨闔  
會看白日起沈鱗

漫與

長吟擊碎玉如意  
痛飲倒翻金叵羅  
悲喜無端空復爾

國風堂詩前錄卷一  
窮通有命欲如何地天終日任行止風雨中宵雜嘯譟  
何限傷時憂國淚年來揮灑已無多

美人

美人如滿月皎皎當高樓今夕爲何夕無愁果有愁明  
星三五爛溝水東西流不語理瑤瑟君聽絃外秋

會稽舟中同仲車作

方舟日暮溯長河村市斜陽帶綠波下土蒼蠅聞大笑  
吾曹白眼自高歌流離文字荒寒甚莽蒼山川感慨多  
無限少年懷古泪禹陵秋色鬱嵯峨

旅病杭州同楊省齋師魯曾作

終朝偃臥負壺觴藥餌生涯各自傷滿目江山非故土  
高秋雲物近重陽鏡中顏色看看改病裏名心漸漸忘  
一樣羈愁難慰藉支牀相對說家鄉

餘姚

湛湛姚江清不埃令人卻憶黃南雷大賢此地所生長  
昔歲今朝曾到來載酒風塵仍故我感時懷抱向誰開  
推蓬一讀明夷錄回首人間亦可哀

歲暮得鄭念若光祖書賦此報之

經時不見鄭生久今日書來倍愴神蹙蹙巾裾餘涕泪  
勞勞生計到鹽薪可憐咄喑窮愁境坐困欽奇歷落人



四庫全書  
同治十三年  
一樣艱難悲失水且分餘沫活枯鱗

同厲虞卿玉夔同年登陶然亭題壁

殘陽疎柳夾城闌暇日登臨客感新終古危亭此秋色  
近來長句屬何人酒尊惘惘依空曠意思蕭蕭出苦辛  
憔悴京華吾與汝但飄涕汨落煙塵

游仙詩和葉子川侍御慶增

羽葆幢幢列隊迎瑤池西望紫雲生丹山赤水渾無賴  
又駕青鸞下玉京

隸籍瑤清豈偶然瓊丹服食亦前緣但教竊得淮南藥  
雞犬聯翩也上天

跌蕩紅雲擁九閭上清消息阻銀潢東龍西虎森嚴甚  
不許羣真近玉皇

宴罷鈞天月正濃霓旌羽蓋列重重不知何與真妃怒  
十道飛符索黑龍

彈指

彈指箏琶隔窈冥畫樓天遠感飄零酒邊墮月無情碧  
眉外殘山有限青星色微茫將夢轉雁聲清切帶霜聽  
十年觸著閑思想能使行雲一夕停

與貞伯夜話

高城隱隱柝聲殘絮語更番夜欲闌彈盡燭花渾未睡

單衣相對不勝寒

悔詞

淺水天桃花正開胡麻回首憶天台素波湛湛明如玉  
重向前溪問渡來

不待言愁始欲愁浪浪涕淚灑箜篌東西溝水無消息  
悔把琴心誤白頭

橫黛庵雜詩

偶從姑射乞靈砂眉語玲瓏透碧紗一咒相思無等等  
人天紅豆盡開花

一寸禪心澹不波茶煙漾漾意云何洞門不鎖桃花住



自翦春雲補綠蘿

幽居空谷不逢春  
賣盡明珠未療貧  
日暮天寒羅袖薄  
可憐絕代此佳人

子夜春燈敞藻筵  
玉尊太息感嬋娟  
朱絃零落華年誤  
流涕樊南錦瑟篇

齊紈新繡扇頭詩  
用玉縱橫紹繚之  
祇恐馨香懷袖歇  
秋風腸斷謝芳姿

廣袖天風拂若華  
夢魂蹋鶴訪桃花  
紅牆一帶分明是  
祇少天西十丈霞

吹簫曾憶鳳皇臺  
鈿約分明字字哀  
有日閒情都懺盡

國朝詩林卷一  
三  
青山一幃證如來

題月底橫箏圖效昌谷

霞綃銀燭花娟娟玉河四照天無煙美人窈窕隔簾坐  
橫箏自理鴛鴦絃箏聲沈沈細如髮斂袂無語意淒絕  
三尺娜婀紅梔風一鏡璫瓏碧蘿月眉樓今夕桃笙涼  
簫阿拂壁羅幃張花袍白馬歸來晚金雁蕭蕭空斷腸

消寒第一集集醉經閣

湛湛金尊酒十千高樓歲晚此流連清時公讌思王粲  
亂世微官薄鄭虔慘澹文章東武歎窮愁雨雪北門篇  
相逢且作亡何飲莫爲悲歌損少年

同作

姚壽祁

排除殘歲嶢嶢事料理浮生頃刻間  
大句荒寒破空出高樓突兀向天攀  
酒邊積雪明斜照雁外頽雲接亂山  
光景無多年易盡歡歌聊復慰孤孱

同魏仲車楊輯父睿曾夜宿叔申齋中有懷念若  
并示諸君

山城一雪寒切膚如灰山色枯不腴  
北風獵獵嘯老鳥凋年急景真須臾  
悔復先生興不孤興到召集諸酒徒  
餅之罄矣壘則虛商量典到山妻襦  
芋魁磊磊煨地爐佐以春盤酸冬菹  
燭光瀲灩浮凍壺梅花爛漫照座隅



坐有飲者皆腐儒形迹脫略無爾吾轟堂拇戰聲徹衢  
酣嬉叱咤頭爲濡飲半擊缶相唱喁高歌偈側涕落裾  
睥睨六合生煩紆忽憶鄭生今灌夫酒狂謾罵心膽麤  
一飲往往三百觚劉伶李白皆隸奴昨日飲罷忽不愉  
擲杯而起長歎歔掉頭歸臥荒江廬鸛江月黑雲模胡  
思君一夕魂九徂嗚呼我輩奇窮俱生事蹙迫嗟難圖  
腹中空有破爛書可憐囊中一錢無何況薪桂米又珠  
不易匪但長安居予手拮据予口瘖坐令嗤笑問妻孥  
今日雖復樂斯須炊煙行斷家中廚糟邱百丈高嶽嶇  
難爲我輩藪逃逋麒麟在櫪鳳在笱天荆地棘皆窮途

噫嘻我輩奇窮俱鄭生鄭生將何如

歲暮雜感

戢景邱樊歲欲闌窮居憂患浩無端此生自斷天休問  
來日何堪事大難海嶠風聲危戰伐中原文物絕衣冠  
橫流處處難容足莫怪王尼泪不乾

百道徵求走羽書重臣籌餉到窮閭冠纓爭拜通侯節  
玉帛翻迎使相車徧地謳歌聞碩鼠過河生計泣枯魚  
哀哀黎庶脂膏盡畢竟羣公善積儲

緹騎蒼黃遍道途相臣有意坑羣儒一朝鉤黨開惇卞  
四海清名誤及廚終使儒冠淪絕域況聞學舍委荒蕪

鴻都從此風流盡安得豐碑頌翟酺

大帥聲威動百蠻從容白髮鎮江關旌旗曉見丹陽郡  
鼙鼓秋高幕府山羣盜共驚隨會在中朝竟召岳飛還  
北門鎖鑰今安屬祇恐東南事日艱

峨峨形勢鎮吳川門戶高雷又棄捐蜃氣幻開羅刹市  
腥風橫鼓佛郎船孤城烽火呼倉葛滄海旌旗起魯連  
多少蒼生齊待命猶堪一戰奮皇天

虎視尊槃氣不馴誰能深算折強隣兵威豈謂資回紇  
和約翻教結女真黑塞飈輪通道路白山王氣走金銀  
陪都眼看胡塵起不待長沙論過秦



與叔申夜飲

相對清尊各惘然  
殘燈今夕照無眠  
酒邊斷夢尋常憶  
彈指人天已十年

憂時

迷陽卻曲總傷心  
空有憂時淚滿襟  
姪姀哀吟誰與聽  
九天風雨夜沈沈

對酒示叔申

歲晏山城正雪霜  
我曹尊酒尙能狂  
纏身坎壈難終日  
披髮曹騰叩大荒  
八極王風悲蔓草  
九閭兵氣動欃槍  
匣中孤憤君應解  
秉燭相看汨萬行

回風堂詩前錄卷一

回風堂詩前錄卷二

慈谿馮并君木

人日集雲壑草堂庚子

城東水木湛清華新歲相逢此駐車  
高館芳尊對今雨草堂人日有梅花  
八荒春色連烽燧一檠軍聲入鼓笳  
家國悵悵愁日暮慙將詩酒遣生涯

庚子二月將有處州之役同人餞之東山道院卽  
席賦詩留別

芳時宛宛有俊風浮空雲色天微陰  
春氣爛漫況離別清尊白日震澹心  
人生嘉會良苦少岸柳山桃爲誰好



西廡堂詩集卷二  
一  
汧汧流水惜華年契契離憂感百草離憂積如匪澣衣  
琴歌彈指吁無期煙江日暮飛春雁回首高樓祇落暉

石門

玉虹天外忽飛來絕壁蔣蔣亦壯哉上耀金銀雙日月  
下留沙石古風雷尾閭終古流無極渾沌何年鑿始開  
欲問犁眉讀書處夕暉紅上軒轅臺最高處有軒轅邱  
自温州泝舟至麗水

挂眼浮巒暖翠間重灘複水幾迴環三朝三暮孤篷底  
看殺甌江兩岸山

送朱碩父廣文丙炎歸杭州

朝陽麗亭皋微風振林篠離尊罷清讌感此忘年好夫  
子人中彥名德何昌劭微官隱山阿幽憂疇能告一月  
奉話言意氣動八表沈沈芳逸思惻惻滿懷抱嘉會忽  
以曠登車指修道山川浩蕩中歷歷見歡笑美人惜春  
華君子愛芳艸睽離何足悲馨香以爲寶

寄姚寥陽

烏柏陰陰勞燕飛朱門迴首感芳菲西山日暮懷人路  
知有涼風吹汝衣

麗水午發

行役逢炎暑誰憐客子勞瘴雲盤地起沙路刺天高風

國朝掌誥肅鉉卷二  
景自遼廓兵戈況驛騷蒼茫憶家室歸思日滔滔

庚子夏日感事

信盜由君子朝廷事可知亂階職拳勇國釁啓華夷大  
將誇襁敵中樞表出師安危付公等憤憤咎奚辭  
列國旌旗集蒼茫渤海頭齊方盟展喜宋竟殺申舟兵  
氣橫三輔民勞汔九州金繒須準備宰相有奇謀

蘭谿

翠羽文鱗各妍媚澗花厓竹相鮮新盈盈幾尺蘭溪水  
直送青山到富春

獨坐



疏窗掩燈火落葉滿庭戶空堂夜漸闌獨坐聽秋雨

早起

起聽鳴雞第幾聲卷簾微覺薄寒生疏星三五斜河曉  
湛湛天光似玉明

與楊微齋游姜家壩時余又將有處州之役

叢蘭被霜霰馨香不可擷寂莫歲寒心空山拾木葉  
拾葉鬻白石領略茶之芬濛濛一尺煙飄作前溪雲  
褰裳度煙霏草徑何曲折落日滿皋原鐘聲在木末  
今日偕我游明日與子別夢魂如肯尋來蹋枯蒼雪  
將赴處州留別魏仲車

國風堂詩集卷二  
三  
歲暮復行役勞歌祇自傷平蕪下斜日衰柳拂清霜境  
迫難將母途窮且越鄉別時有涕淚滴滴灑君旁

永嘉道中

永嘉山色鬱蒼蒼但有鄉心墮渺茫遠戍風高迴鼓角  
平江木落見煙霜天寒汲汲年將晚日暮迢迢路正長  
攬鏡空餘皮骨在不知奔走爲誰忙

甌江舟中

蕭蕭楓葉舵樓殘日暮行人傍水餐落木空江煙浪闊  
逼人光景是荒寒

隱約星光墮枕明單篷夢醒若爲情荒灘水石瀟瀟裏

不是家山夜雨聲

青田

太鶴峯前暮雨收  
青田山下行人愁  
不須喚起沙汀雁  
一夜灘聲已白頭

青田學舍贈陸藍卿廣文智衍

稅駕芝田已夕陽  
孤城風景賸荒涼  
眼中突兀見吾子  
天末琴尊非故鄉  
衰世官貧餘涕泪  
空山歲晚惜芬芳  
十年忽觸平生感  
不爲君悲亦自傷

贈馮君木

陸智衍

才調如君亦轆軻  
微官憔悴託山阿  
胸中朗朗生明



月筆底蒼蒼起大波裙屐三河年正少文章十載恨  
偏多相逢欲作同聲哭奈此人前涕泪何

寄婦

明燈晫晫錦衾旁清夜迢迢徂洞房亦有思君萬言語  
短歌含意不能長

屋梁月色滿懷中放悲微波語可通夜半雁聲忽墮地  
枯桑颯颯正天風

有憶

記聽銀箏菩薩蠻美人家在橫塘灣梨花鏡閣臨春水  
上有青青幾尺山

芬芳衣帶理前歡一帖深情欲寄難日對長毋相忘鏡  
思君使我不能餐

寄叔申

寥寥隊葉拂庭柯冷署無人掩薜蘿亂世詩篇供瞑寫  
荒城歲月送悲歌蓬蒿李白功名賤滄海王尼涕泪多  
稍喜石門堪避地約君他日著漁簑

寄陳天嬰

鄉關十載負狂名豈料人間尚有卿眼底衣冠牛馬走  
醉中歌哭鳳鸞鳴少年奇服憐同好舊約名山誤耦耕  
感別傷時多少泪昨宵夢裏對君傾

檢童時詩稿見有黃巖王六潭先生詠霓題字其上推許甚至感賦一律

童年弄筆苦無律老輩愛才真有心言言推暨稱同調  
字字商量到苦吟十載以來未識面一編相賞慙知音  
祇今絃軫都零落孤負成連海上琴

歲暮懷人詩

栗如山玄玉皎若江歷珠貞期惜不遑老此天上姝惡  
員有述作寂莫朋猗玕楊省齋師魯曾

冷官宜歲寒蕭然足怡悅煙埃飛不到燈火皎若雪籠  
手看梅花寥寥共清絕關來青師維震



陳生玉立人眉采橫青霞芳香古懷抱不爲飢寒嗟冰  
雪一萬頃中有幽蘭花陳晉卿文學鏡堂

一燈明露屋上接五緯光金水頰內景其言多吉祥焦  
明厲高唱萬喙徒蜩蟬楊遜齋孝廉敏曾

老梅聖八法下筆發天巧恥與肉食謀甘受市兒黷袖  
中說餅文寂寥艱一飽梅報翁先生調鼎

弱歲起文苑齊名吾與汝滂塗一顛躓欲飛痛無羽姪  
姪萬詞賦盡是傷心語應叔申文學啟輝

吾兄感槩士肝膽照流輩高睨挾天閭悲歌裂地肺微  
塵有蚊虻一任申申詈族兄汲蒙孝廉毓孳

亡何日痛飲自稱古酒徒睥睨九乾外其狂吾不如庚

庚見膺肺八尺紅珊瑚

鄭念若文學光祖

忍飢畢墳索卓犖忘其貧心光瑩古月剡剡照千春著

書沮舍底上有七色雲

魏仲車文學友枋

潭思日數戶不暇傷其屯文章發珍怪星月秋渾渾可

憐荆棘場寂寞走麒麟

陳天嬰文學訓正

娒娒思予美衣帔何清豐在抱璇玉詞叩之聲璫璫夢

中巾子山色青濛濛

柴予平同年正衡

慷慨撫時變坐席暖不暇談兵走鄉里不畏羣兒罵寥

寥子弟軍靴刀悲叱咤

錢吟韋文學保杭

武功高瞭士途窮名亦晦浩歌風雪中崢嶸鬱肝肺白  
眼看世人咄咄橫今涕姚貞伯布衣壽祁

楊生吾弟畜苦爲窮所欺米鹽萬凌雜埋此冰雪姿枯  
桑支老屋日暮聞嗟咨楊石蠶文學睿曾

除夕

夕陰凝庭柯空山歲忽晏匡居感化別憂來不能飯夙  
稟慈母愛嬌嬈猶童邅家衙朝夕離綦切倚閭盼何況  
此行役去去日益遠道路旣以修節序又以換思親不  
見面行子腸欲斷寧知思子心昔昔車輪轉帟幃有至  
樂藜藿勝珍饈光陰抵川陸坐使天倫賤遙遙望白雲



宛宛隔鄉甸明明明星光脈脈照嗟歎

游洞谿辛丑

樓閣浮瓊雲亭亭出蒼翠清暉在林木衆峯沓陰霽孟  
陬凍塗滌春陽嬰羣彙褰衣適莽蒼丹扃叩人外曾城  
頰窈窕繚以淺淺瀨實庭合百草靈芬般裔裔茗茗列  
仙儒青霞澹冠佩疏麻不可折微風吹蘿帶眷茲靈圉  
宅葱鬱佳哉氣焉知下土人埋憂痛無地日暮倚閭闔  
人間今何世神皋淪貊鄉反顧忽流涕拂袂欲上征鳳  
鸞眇天際一陳遠游篇縹緲託遙喟

螺子樓雜詩

網戶簾低挂曲瓊琵琶如雨正三更玉槐花下明明月  
腸斷瓊瓏指爪聲

清絕人間福愛天郎爲瑤瑟妾爲絃平生木石堅牢性  
輒似兜羅十尺絛

定情久已薄繇欽經卷茶鐺入道深何事照春屏底夢  
又將一袜貯雙心

秋風一夕感芳菲零泪珠珠滴苧衣宛轉爲郎訴蕉萃  
憂來祇恨不能飛

與叔申話舊

回首平生百坎軻酒尊涕泗各滂沱昏燈落葉蕭蕭裏

回風堂詩前錄卷二  
八  
悽絕人間咄咄歌

車輪四角歎途窮百憤千憂與子同抑塞沈淵誰拔爾  
九霄蕩蕩自春風

煮酒時時對故人十年懷抱惜芳芬大園雲氣昏如墨  
欲訴沈憂恐不聞

華燭淒清照鬢絲傷心不是少年時何當披髮青山去  
日暮雲深覓導師

葉葉

葉葉衣雲檻外晴眉痕隱約若爲情滿堂箏笛秋如雨  
白日明明乍目成



曲肱闌干葉底深後堂芳樹晝陰陰記從酒罷更衣處  
掬示玲瓏一片心

呈陳藍洲先生豪壬寅

拄杖相尋到小樓沈寥天地正悲秋高歌顧我迴青眼  
知己無人念白頭藥餌周旋哀旅病語言辛切戒詩囚  
西溪水石蕭蕭裏那得從公寂莫游

讀楞嚴二首

萬古毗羅城煙蒿莽蕭瑟彈指隔人天窈窕見明月  
埃塵苦蓋纏震旦墨若夜手把慧之花亭亭自天下

悼詞

殘月隊九幽迴光碧如血鬱鬱女郎心萬古埋其熱  
金瓶落智井覆以花楚楚欲叩幽門扃蒼茫不是路

送家晦庠北上時同人設餞於瓊人仙館

解佩青樓聽豔歌離尊相對奈愁何五年忽憶京華夢  
宣武城頭落日多

回首長安有狹斜明河鵲鵲隔天涯風塵瀕洞無消息  
愁熱都梁錄夢華

迷茫小劫感人天猿鶴蟲沙總惘然策馬幽州臺下過  
不堪滿目是山川

笳鼓津門不忍聽南天回望感漂零丁沽海色橫秋黛

不及家山一髮青

滿堂畫燭動簫箏中有悲離感亂聲觸我傷心無限泪  
酒闌滴滴對君傾

有憶

瑟瑟金風吹薄羅綠苔小院晚涼多尊前月子有淒色  
天末佳人能好歌汨點空濛飄斷雁秋心宛變接明河  
虛牕燭滅清無寐獨倚參差奈恨何

右詩爲余十六歲至三十歲時作意趣神氣與十年  
來迥異知交中多有謂余詩前勝於後者輒刪存十  
一用曹子建例題曰前錄徇故人之意聊復宥之云



爾甲寅八月木居士記

回風堂詩前錄卷二

回風堂詩卷一

慈谿馮并君木

春日杭州寄婦癸卯

勞歌草草惜華年  
晚晚春陽祇惘然  
念汝人間又天上  
相思樹下卽門前  
故山芳草生哀怨  
燕寢清香隔眇緜  
識得佳人詞筆苦  
夕暉紅到鷓鴣天

吳山酒樓與范蟄盦

耀雯同飲

沈沈際地蟠天想  
蹙蹙憂生念亂情  
坐覺酒悲來莽蒼  
共攀年鬢惜孤清  
雁邊日落明江色  
木末風迴帶市聲  
人海埃塵居不易  
但從杯底著浮生

媚媚

媚媚秋風吹女蘿幾回流睇憶山阿美人窈窕在空谷  
佳語蒼茫橫大河天際斷雲飄夢遠夜闌清淚比星多  
徘徊光影無人見淒絕箜篌宛轉歌

式微十章甲辰

式微式微胡不歸緇塵十丈拂征衣春風陌上花開日  
回首家山祇落暉

式微式微胡不歸炎炎之室棟將頽君看梁底涎涎燕  
祇向行人行處飛

式微式微胡不歸東南日出雲蔽之高邱反顧忽流涕



嗟我悅君君不知

式微式微胡不歸飄風發發百卉腓東西溝水無消息  
辛苦落花都作泥

式微式微胡不歸勞歌佻佻無息期淒其以風絺綌薄  
誰從九月問裳衣

式微式微胡不歸憂心惄如匪澣衣清歌曼舞當君意  
我獨空房理玉徽

式微式微胡不歸深山有雉伏以飛可憐絕世好毛羽  
卻與老鴉同苦飢

式微式微胡不歸停辛佇苦無人知嬋媛太息春陽晚

國風堂詩卷一  
二  
減盡容光卻爲誰

式微式微胡不歸風波如此吁可危南山張羅北山弋  
好語西鳥莫夜飛

式微式微胡不歸舊鄉臨晚黍離離亂離瘼矣歸安適  
不信我生逢百罹

至鸛浦貶鄭念若病臨別感賦戊申

相見復相別難爲宿昔情纔能謀一面或恐了今生欲  
語轉聲咽認人猶眼明無言堪汝慰制泪出門行

哀念若

雌蜺夜哭雄鳳踞靈氛泣涕來相告曰有酒星毀其耀

萬喙同聲矢嗟悼鄭生磊砢以酒名是古君子今狂生  
照人肝膽有雪色撐地骨節成金聲世人皆生君獨死  
嗚呼鄭生止於此魂魄歸來無遠遙看爾青天蹋龍尾

送別學官關來青師維震歸杭州

仁和夫子人中賢心抱皎若蒼領淵持躬退讓爨居後  
赴義勇往瑗請前春風坐我二十年蕙蘭橫扇芬無邊  
手持白日照大千黑壤齊放光明天采苓未畢胡舍旃  
奪我寇君吁無緣上下四方逐公去招公爲賦歸來篇

哀陳晉卿

百杵春琬琰千炬煬薤蘅云何千戾天帝而阬我世英



吁嗟乎晉卿獨絃哀歌希無聲懷中古月韜光瑩戢景  
囂世間忽忽矧其生吁嗟乎晉卿卻曲傷足踣步棘荆  
園則九重虎豹縱橫寸天尺地皆陞圜吁嗟乎晉卿纁  
黃之世躬是丁汰萬砂礫成獨清騰駕上逝翩冥冥吁  
嗟乎晉卿莽濤波橫滄溟高天沈寥秋有星笙簫笛鼓  
攬把箏九流百家子史經招君之魂娛君靈蹇誰留兮  
君不行君不來泗以零萬古鬱鬱薶芳馨吁嗟乎晉卿

有感

西湖居士骨應槁宛邱先生屋打頭但覺衿裾非俊物  
可堪出入有奇愁喚回天上迷離夢招到人間颯沓秋

十丈金風肯相借願吹心泪滴滄洲

舟中同陳天嬰作

木落江空地荒寒祇此舟疎星照垂泪苦語逼清秋相識近來意能同人外游歡娛定何物難得是幽憂

病中聞叔申病劇力疾走省賦此

跬步苦無力爲君始一行到來木葉落坐覺秋風生憂患人間世微茫死後名區區同病意揮涕惜孤清

贈洪佛矢允祥

洪君磊落人之英可惜奇窮不世情命託長鑱白木柄心依天竺古先生相逢尊酒狂猶昔出手詩篇老更成

便欲打包從汝去寥寥初地悟因明

病起

飲冰內熱鬱崢嶸病起今朝暫樂生薄暝池亭留雨色  
經秋草樹帶霜聲蕭蕭短髮猶能黑寂寂孤吟亦自清  
紂桀舜堯俱腐骨世間何物是浮名

菊花

銅瓶插菊花一枝兩枝妍澹澹無言說乍見明燈前

喜叔申病閒

又得須臾活悠悠良苦辛世應忘我輩天遣作詩人餘  
事文章重殘生感槩真百年誰不朽莫待恨無身



歲不盡二日與石蠶蹋雪東山并東天嬰

曠絕冰天試腳行岡巒高下雪初晴傍山湖水陰陰黑  
出樹墟煙的的明窈窕喜尋人外境芳香遙寄歲寒情  
皇童山下清吟苦應聽風簷折竹聲

除日與叔申石蠶出西郊用前韻

除日荒郊躑躅行高天寒色半陰晴斜陽苦促殘年盡  
積雪能爲薄晚明等是飛騰傷暮景無多哀樂赴深情  
歸來蹋壁齋頭臥各聽山城爆竹聲

叔申連日賦詩未就疊前韻調之己酉

應生健者孰抗行一語能令天雨晴筆下有神雜奇怪

目中無宋況元明  
茗茗故佇停雲興  
兀兀深矜唾地情  
鼃吠蜚吟徒聒耳  
最難衰世鳳皇聲

次韻天嬰寄寄禪上人敬安

攢眉入社苦多年  
況值杼山老皎然  
玄箸已超四無礙  
高歌再放一回顛  
寥天風雨存孤聽  
初地空明證定禪  
悟得拈花微笑旨  
故應合十世尊前

夜宿君木齋中余告君木寄禪長老將招要吾  
黨結一詩社月課數詩君木首肯因賦一律示  
君木並寄寄禪

陳訓正

光景流連憶少年  
何堪人事各紛然  
能窮日月爭東

野可老心情得大顛相約吟詩聊作懺不成學佛卻  
逃禪爾來身世都無著祇覺蒼茫赴眼前

疊韻贈寄禪

天童一臥幾經年開士風期故灑然合眼神游燭龍外  
苦吟聲出木魚顛無言山色超三昧入定詩心契四禪  
欲乞支公買山隱萬緣如海不能前

寥陽喪偶不娶頃自上海納姬歸爲賦一詩

一舸桃根乍載回空房宛宛又重開正須健婦支門戶  
且可中年遣樂哀痛汝無家今少慰憐渠遠道肯同來  
天西月沒星教替莫復傷心舊鏡臺



不死

死亦尋常事其如不死何將愁支旦夕無意惜蹉跎久  
病人同棄餘生累尙多一抔知所息扶眼望山阿

何條卿貽余梅叔翁書賦此報謝

老梅一逝忽三年墨妙流傳更值錢能使光塵照寥廓  
直迴蒼老作清妍弄丸手法憑誰解脫佩心期感子賢  
今日人間無此筆相看狂喜復潛然

秋夜憶叔申

不是清吟苦何緣更費才所懷成寂莫將病託悲哀江  
雁頻頻落檐花故故開夜闌憺無寐祇汝上心來

牛疫歎

宣統元年秋寧波牛疫作耕牛死村人棄之河  
齒骸戢戢乘潮下上人民飲其毒乃裁於厥躬  
厲氣播揚遂成大札馮子傷之作是詩也

朝死耕牛暮死耕牛牛醫躑躅耕夫泪流有博其碩有  
齒有骸不土之瘞而河是棄河流湯湯牛來無方河流  
涓涓牛墳且腐朝死耕牛暮死耕牛牛死猶可牛腐殺  
我我汲我釋我飲我食瘕我札厲全河其墨倪旦殞矣  
旄夕於及啞啞笑言眴焉零泣戚戚皇皇大命靡常匪  
天降戾人實自殃殃之既至孰懲孰毖彼昏者尹曾是

不意傾淚於河以矢我歌牛死猶可人死則那

重九日石蠶冒雨過存流連竟日而去

良時阻登眺且復一流連坐雨開高閣排花照暮天吟  
多增茗思話久費鑪煙不見龍山色空濛落眼前塔山  
俗稱龍山

寄天嬰

去作杭州客飄零稱汝才江山清可念詩句澹能哀感  
此經時別都無一字來朝朝懸望眼那得使心開

次韻君木見懷

陳訓正

踈踏竟何益栖栖惜此才心懸孤月冷指怯獨絃哀



懷抱向誰盡風塵悔我來翻憐故園菊日對病夫開  
臥病兩月章生巨摩闇時時存問感而賦此庚戌  
孱棲閉戶賓朋少闇也過從不待招稍喜病中聞警效  
肯來人外慰蕭寥浮空苔色冥冥合閣坐鑪煙片片銷  
百遍相看渾不厭無言足可遣今朝

病中寄寄禪

淒其以風八月中秋之爲氣太清空覆簷煙蔓苦黃落  
照眼露花能白紅病久自憐臣質死命衰遑恤世途窮  
天刑桎梏憑誰解夢裏無緣問澹公

病中蓄秋蟲十許頭啁哳齋壁間藉破寂寥

寂寥臥病無言說聊遣微蟲爲一鳴但有傷心助長歎  
亦能刻意作秋聲瓦溝涼吹蕭蕭落板屋清霜脈脈生  
收拾幽憂從付與苦吟迸泪不勝情

內熱

口燥唇乾呼不得頭焦額爛將毋同肺肝似蘊三升火  
談笑難生兩腋風可許飲冰消內熱真成踞竈老冬烘  
瓊樓玉宇高寒地魂魄猶應樂此中

寄懷洪佛矢

多君別後常精進聞說猖狂蹈大方胸次鬱生滄海氣  
眉端應放白毫光文章連牋張三世歌哭悲涼動八荒

怪雨盲風今徧地微吟期爾惜芬芳

閉關

堂堂秋色來人間嗟我寂寥長閉關荒青老翠不到眼  
但有三尺牆頭山

天嬰抵書垂問病狀讀罷感賦

素書一尺自天隕病夫對之雙淚流  
慙拓塵勞還念我苦搜蕭瑟與言愁  
可堪來日少佳況自斷此生難白頭  
曠絕雲濤千頃外知君決眚向清秋

病久不瘳至上海就醫楊省齋師同居逆旅中朝  
夕在視將護備至感呈一詩



回風堂詩卷一  
力疾跨滄海言來尋我師敢將微命託倘得更生期  
旦勞調護深深慰鬱伊病中兼客裏不念在家時

底用

已落人間世煩冤寧自禁俗流多忤視時事必傷心  
地成孤寄數天念陸沈汝身非汝有底用雪哀吟

咯血

滴滴心頭血秋風吹不涼盪胸生鬱勃唾地出芳香  
才盡腸猶麗悲深志與荒斜陽照床額悽絕未能狂

旅夜遣懷

橫街燈火照無寐隔屋稚娃啼到明聊當卷簾看秋月

匹如攜酒聽流鶯堂堂與汝安心法澹澹都忘入世情  
洗盡意根煩惱濁人天自在任飛行

旅病雜詩

馳道高樓敞落暉樓中客子獨垂幃終朝合眼心無住  
祇逐車輪馬足飛

東屋嘈嘈簫笛筵西屋切切箏琵琶病夫別有閑思想  
夢倚白楊聽老鴉

姑射仙人瘦不肥胃腸如雪映朝暉九天咳唾隨風落  
散作桃花片片飛

病久咯血其色絕麗以二十八字賞之

苦辛不惜典衣襦累汝勞勞念客途乾谷枯魚難獨活

更分餘沫到江湖

病久資絕內子遺舊僕賣銀至

甚囂塵上聞市聲銅山峨峨一夕傾市魁落膽富兒泣

獨有病夫心太平

記上海近事

### 病間歸里留別省齋師

百日沈疴今漸起非公救我倘應難似將明月懸心眼  
能使春風著肺肝攬鏡不愁生意盡吟詩稍覺病懷寬  
自攜面目還家去儘許妻孥子細看

### 自題逃空圖次寄禪韻

辛亥

入世不能遁而佛煩惱海中一身拔眼耳鼻舌都無緣  
呻吟闐寂同枯蟬壙垠之野天不遠人耳人耳惡乎伴



撫髀雀躍髡厥頭廓落天地成墟邱爭光魑魅避不顧  
入夢髑髏來相求戒珠破衲無多子解脫天刑百骸理  
底須蹙蹙賦囚山心在虛無縹緲間紅塵萬螳杳何許  
擾罷雄龍狎雌虎

次寄禪韻贈太虛上人

阿師長不滿五尺光氣籠罩千緇流語言鬱鬱有至性  
眉額蒼蒼橫大憂獨往可知逃是託悲歌真與命爲仇  
夜深出定忽拊掌射殺天狼四十頭

贈林黎叔端輔

林子不喜詩我獨以詩贈平生愛子心今夕試一聲維

子實天授朗抱堅牢性決心奮獨往百難皆退聽沒頭  
入學海窮索靡一牘風波萬搖兀力欲求其定于身支  
巨廈汗與血泪迸妻孥嗤子拙充耳去不應晏安寧不  
懷酒醪恐難醒辭肥坐守瘠貧也乃非病維子口訥訥  
懋哉焉用佞永持方寸心一照破千暝

贈巨摩

幽憂能與共四海一章閭轉轉嗟吾病亭亭覺汝親相  
將成冷僻所得是悲辛捩眼人間世荒茫孰解人

雨風竟日遲巨摩不來

草樹將秋至蕭蕭滿井闌無人共清曠竟日作疏寒葉

墮關冥想雲飛騰獨看闌風兼伏雨知汝出門難

獨處

軒館秋風起寥寥獨處心排愁出幽曠蓄泪到孤吟意  
悴花能識思深雁與沈無言看逝景飄瞥過城陰

叔申自上海來中途遭大風舟幾覆見面驚喜爲  
賦一詩

迢迢天際識歸舟寧料橫風犯石尤一死一生倚蒼昊  
三朝三暮阻黃牛道來險語猶應噤坐定驚魂稍覺收  
執袂相看紛涕笑勞君奪命向洪流

夢中作



瑟瑟微颼吹日斜青瑤百尺照晴沙病鷗迴眼看江水  
漸覺秋涼到荻花

紀夢

黃泉碧落無消息角枕單衾帶苦辛昨夜亭亭曾見汝  
分明不是夢中人

見巨摩作家書感賦

慈親兩字何突兀刺入孤兒眼底來正復蒼茫感家室  
能令骨節生悲哀劬勞恩自留天壤慟哭聲難徹夜臺  
除是黃泉相見日融融大隧或能開

江行

日夕苦思汝汝應知我哀我行江水上汝入夢魂來夢  
境番番變江潮故故催無由化雙蜨下上青陵臺

辛亥除夕

我生三十九除夕今夕傷心第幾回已痛死妻拋我去  
況堪新病迫人來鮮民餘感頭頭觸臘鼓殘年續續催  
迸入昏沈懷抱裏人天無有此奇哀

回風堂詩卷一



回風堂詩卷二

慈谿馮子君木

醉後作壬子

憂時感逝百嗟吁  
暫遣人間作酒徒  
埋我故當拚一死  
浮生且可樂須臾  
肺肝內熱消都盡  
歌哭中年醉亦孤  
市上狗屠盡騰達  
祇應落莫向黃壚

上海觀冷樂贈賈郎璧雲

窈窕佳人絕可哀  
自攜娟步獨登臺  
清宵宛變生朝采  
造物瓊瓏見異才  
眉黛都將諸色聚  
眼波能攝萬形來  
蕭蕭金雁櫻桃館  
一夕愁心爲汝開

幽懷詩

鏡檻羅幃著此身  
洞房蕭瑟不生春  
明明畫燭明明月  
但有迴光照故人

幽閨日夕展清塵  
簫局飄香帶苦辛  
亦有殷勤難自致  
傷心約指一雙銀

豔歌婉變感清商  
金雁蕭蕭祇斷腸  
二十五絃彈不盡  
可憐錦瑟似人長

纓佩繽紛誤蹇脩  
青谿小妹本工愁  
繁霜歌罷箜篌冷  
葉落鍾山怨蔣侯

奇氣青霞鬱不申  
腸中昔昔轉車輪  
才華未盡心先墜

始信江淹是恨人

畫屏銀燭夢依稀  
秋鏡花明蠟燭飛  
的的寸心奈何汝  
枉將羅袖拂臣衣

解佩高邱計已非  
離房幽壁惜芳菲  
郎心縱似秋風冷  
忍向纖羅扇底飛

淒淒絮語託纏綿  
蕉萃姬姜亦可憐  
從此煙羸花瘦地  
安排涕淚過中年

弔寄禪長老

長風自北來  
俄傳阿師逝  
人天盡錯愕  
海水爲之沸  
阿師血性人  
慈悲填膺肺  
栖栖北南東  
恆幹等敝屣  
徹天



收涕洟發洩到興比其詩好無疆  
眈眈見清思光塵若日月  
湯邇眼都眯昔者見阿師  
風雨滿臣里玉雪一尺髯  
飄瞥照空際維時方重九  
秋花爛蕭寺說詩抵夜闌  
往往中肯綮對視各微笑  
莫逆自茲始自茲不見面  
見必以詩至籃輿十往返  
商量到一字寂寥人間世  
相慰賴有此由今思疇曩  
此樂故忘死豈謂昨見佛  
我聞今如是烈芬倏漂散  
衰蘭那可恃吁嗟詩教微  
豈但宗風圯矧余宿孽深  
糾縛難自理沈沈苦惱海  
一墜竟無底惟師有大力  
庶或拔之起已矣天喪我  
蹙蹙將安倚扶眼太白山  
魂兮歸來只

展亡婦殯宮

紂絕陰天隔死生但餘白日照精誠墳頭一滴傷心淚  
流到人間作恨聲

傷心謠

去年蒼天死泪海荒荒流不止今年黃天立鬼伯虛空  
聞太息雌雷壓頂逋厥魂攀天偃蹇天無門王虺夜哭  
忽不見照眼桃花爛秋電

贈陳彥及訓恩

佳人陳彥及弟畜亦多年意量包身闊聲香出骨妍冥  
心通世變白眼薄時賢肯掬無窮泪哀歌和獨絃

鬱鬱埃塵底呻吟絕可憐委心支骨肉刳腹出纏絲此  
意向誰說相看都惘然艱難吾與汝結舌對蒼天

除夕感念亡婦時繼妻陳病方篤

曠別人天歲又更垂垂今夕若爲情酒盃苦閣經年淚  
燈火俄成隔世明但有新愁迴舊痛不勝傷逝重憂生  
口號存歿寧能遣四壁呻吟雜泣聲

春日憶季則癸丑

篋絕幽明路不通茵幃零落故房空直須索迹黃泉底  
賸可爲期斷夢中逝景虛勞追縹眇苦言誰與證孤窮  
寡居忽忽春非我未信人間有俊風



與從子貞羣尋馮躋仲王完勛兩侍郎合葬墓得  
之

掘衣登北邙言尋死士壟大山宮小山高下盡叢冢一  
冢塊獨夷地裂甃有縫其前欹矮碑蔓滋若覆幪引手  
摹題識色然魄爲悚斑駁漢官字照面生光寵喜心忽  
翻倒下拜繼以踊緬懷明社屋北騎浩呼洵倔强兩侍  
郎義旗起句甬稽天決孟津欲以獨掌壅兵敗身被執  
殺僇到胤種殘骸薶茲地一抔兩人共慘澹白衣冠遺  
民聚而慟曹敞與脂習風義自駢聳到今墓下土熱血  
猶沸涌出土謝豹花爛爛有餘痛飄瞥二百年地下氣

始縱所悲忠義林挂眼皆荒茸九原誰與歸對此能無  
動行當崇其封藁土期親捧拓基新之石斯役應分董  
作詩示阿買語長心鄭重

獨酌

燈火虛堂澹不溫暫憑獨酌遣黃昏簾前殘月和花落  
杯底疏星帶酒吞哀樂中年渾若夢別離萬族但銷魂  
九天夜色沈沈盡寂寞人間自掩門

懷巨摩

載恨出滄海行行胡不來雁聲飄夢斷人意入秋哀  
洞今何世蒼茫念汝才翻憐釣游地滿眼是蒿萊

小屋

小屋在人外寥寥門不開砌苔延屈戍瓦雀下徘徊觸  
緒紛興感吟詩亦費才都將無盡意努力委塵埃

癸丑除夕

匝地窮陰臘已殘端居感逝一汎瀾坐依清夜成蕭瑟  
賸切深哀到肺肝惘惘流光將夢去堂堂遺挂翦燈看  
帷屏在眼渾如昨獨與新知共歲寒

巨摩大醉墮水戲效舒鐵雲體調之

甲寅

一拳槌碎龍宮門一脚踢翻瑠璃盆百頃潏灩非酒尊  
怪哉欲以一口吞我卒當樂死君其問水濱是何欽崎



磨落可笑人拍浮游泳神昏昏清泠之淵作湯沐丈夫  
溺死良不惡波臣含睇水魅叫三千年來無此樂水哉  
水哉仙乎仙彭咸在後靈均前弄潮伍子胥捉月李青  
蓮子安文考皆綺年西施玉貌尤翩翩挹君之袖拍君  
肩一笑歡喜彌人天奈何不爲曹盱沈卻作閻敖逸乍  
沒頭而入忽脫穎而出濡首滅頂筮之凶先號後笑卜  
曰吉送君者方返自厓隊淵倏已加諸膝是惟得全於  
酒而不懼於物亡也忽焉興也勃不然河水洋洋流活  
活吁嗟闊兮不我活罔兩赤水險斯探螻蟻黃泉命誰  
奪噫吁噫神全入水能不濡微我無酒吾其魚從今已

往誠當慶子以公孫朝之千鍾孔仲尼之百觚有不飲者非吾徒

大醉墮水君木師以詩見嘲賦此奉答

章 閏

一斗亦醉一石醉醉眼朦朧盪而墜泳游自恨我非魚漂流幾使人爲鬼水面一望清且漣水底漆黑無青天蛟鼉魚鼈惡作劇我欲留止吁無緣君木先生善嘲謔不弔而賀毋乃虐入水不溺神或全惟酒無量趣已惡援之以手霍復起昨夕大醉吾過矣屈原李白誠所慕子在回則何敢死從今不飲真大愚朝

盡千榼暮百觚君看帶水拖泥者依舊高陽一酒徒  
旣以前詩示巨摩巨摩答詩有從今不飲真大愚  
朝盡千榼暮百觚云云天嬰見詩詫曰巨摩困于  
酒子又張之殺巨摩者必子之言夫余聞而悔焉  
復用前體自訟且儆巨摩

寓言十九聊復爾子獨何爲縱不止嘻嘻旭旭以醉死  
是實賊夫人之子吾舌雖尙存其顙乃有泚世人欲殺  
我操刀嗚呼噫嘻吾過矣念君崇飲何昏昏玉山自倒  
推非人泥中坐困屈正則水底酣眠賀季真百川吸盡  
哆厥口從此逢人但索酒一肩負荷豐侯罌兩手摩挲



亞父斗形骸土木非堅牢有酒有酒安可逃糟邱百丈  
突兀而巉嶢奈何欲以身相鑒願君姑舍是前言戲之  
耳曠飲調飲躬自罰所不竭誠有如水爲君重賦止酒  
詩俗物敗意君應嗤慎毋再接再厲乃且復三薰三沐  
之

夜訪陳天嬰張申之

傳保

徐句羽韜于惺園

塵外追幽好閒門草樹深縣燈就佳夕張酒助清吟竹  
柏浮空合星河著地陰逃虛共蕭寂莫逆此時心

謝句羽餉茶

稚芽相餉春滿籠氣味吾曹訝許同乍可香消花落後

政宜薄病閒愁中排除腸胃出芳冽刻削意思迴清空  
耆好由來殊世俗冥搜澀句與酬功

一落

一落塵寰計已差陸沈憔悴送年華艱難吳市吹簫日  
文字公羊賣餅家才語向人端取厭短生自苦覺無涯  
陳屍屋下疇相問窮巷青楊聒暮鴉

彼蠕

彼蠕者何物肉幹出四枝其上戴一具七竅開離奇僕  
緣大地上蠢蠢何纍纍但覺可憎醜不知名爲誰朝來  
對明鏡刺眼生鄙夷咄嗟天畀我不幸乃似之草木有

本性禽魚亦熙熙無生亮弗遂胡犯人形爲

遣興口號

誰能夜氣回平旦祇取深心照古初眼底斯人渾不似  
寧須逃影出空虛

名流高語媿皇墳恥作人間蟣蝨臣不見朱門槐柳下  
森然玉立又何人

薦紳先生難言之婆娑府縣欲何爲陶潛畢竟可人意  
一首光明乞食詩

蚩蚩奴輩利人財摸犢偷驢絕可哀無復南塘豪健氣  
始知作賊亦須才



區區半李定何物爭食傷廉計亦窮  
槁壤黃泉艱一飽苦將口腹累糟蟲

羣兒口頰自翩翩一語能令醉欲眠  
猶有親人魚鳥在不勞卿輩與流連

落穆不須人索解周旋猶覺我爲優  
伏滔何與胸中事未信袁郎是俊流

平生本無食肉相天下自有利齒兒  
朝朝籠手看山色此意時人那得知

病闌羞對鏡中顏兀傲餘生死亦艱  
乞命皇天真不屑顰拋骸骨到人間

醫院與句羽夜坐

疎星宛變接斜樓  
眼底明河澹不流  
草樹飄涼生夕氣  
肺肝將病入新秋  
單衣稍稍侵風薄  
殘月淒淒照鬢愁  
後日思量應不惡  
分明桑下此淹留

次韻

徐 韜

簾幕高高月滿樓  
可堪風露更飄流  
人生病苦應憎  
命天意纏綿故作秋  
草際蛩蛩分夕怨  
闌邊衣袂得涼愁  
吟形呻影同岑寂  
暫借虛房作小留

天嬰以殺牛詩見視用廣其意

牽牛蹊人田自有主者在咎牛不責人所見胡乃隘霍

霍以磨刀力欲殲巨憝穀鯨良不忍萬一赦其罪彼哉  
多牛翁蹠角畜磔磔參錯置天下踐蹋爲民害誰實尸  
發縱牛也亦無奈奈何奏牛刀祇取一割快丈夫有官  
智用意當在大躊躇立四顧目光出牛背爲語屠牛坦  
提刀且有待

返慈數日存問親友都無好懷感賦一律

大都蹙蹙貧爲累亦有依依病與纏親故漸看無好境  
人生何苦到中年停車巷陌餘蕭瑟入夢煙霜赴眇緜  
惘惘舊時游釣處可憐無地作回旋

爲亡婦俞寫心經百卷忌日設位焚之並賦二律



佳人不見忽三年坐歎行愁祇惘然豈有流光堪把玩  
苦將片念著纏絲一心爲寫波羅呪再世應生福愛天  
滴淚濡毫聊報汝淒淒不是爲逃禪

彈指光塵久寂寥零花賸葉不同條遺芳已掩荒山土  
積淚能生死海潮夢後疎星徒歷歷眼中白日自昭昭  
九原未信靈魂滅欲叩空雲寄大招

贈蔡君默同瑞

吾生有僻性疾富如寇仇匪富之爲疾疾其情澆熈顓  
顓圖自利祇知予取求効死守金穴遑肯爲人謀能聚  
不能散錮金使勿流富室金如山窮人填壑溝蔡君富

者徒獨異凡匹儔狼狼濟物心不稱恆懷憂用意到師  
友體卹密以周下及窮閭子亦與爲燠休相君貌女好  
所稟若至柔焉知任俠腸磊落無與侔我有平生交其  
才班應劉不幸困貞疾長爲天之囚窮愁苦煎迫厥疾  
安有瘳君實非戚婭亦不預朋游徒以憐才意宛變爲  
策籌慨然脫兼金俾之資膳脩探仁出胸臆風義高清  
秋問今是何世人心伏戟矛君獨厚其植緩急真可投  
安得君百輩參錯散九州肝膽所推激覆以雲油油寧  
直喝得蔭且可回民尤賦詩發感慨淚落紛難收

壽費冕卿

紹冠

夙昔役文字苦以壽詞累彼惟多食粟何復與吾事費  
君今長者天骨堅自植讀書明儒效致用足根柢頰首  
屈下僚有志嗟不遂歸來託市隱出手期小試袖中貨  
殖書鰓理俸丹賜挹注關息耗力能支其敝銀海何浩  
汗一靜定百沸犁然立之平編戶有生計平生重任卹  
躬行匪口惠肝膽耿薰發推仁到氣類叔末多澆訛風  
義久飄墜惟君持古道玉雪照心地原嘗今不作此意  
尤可涕日月逝於上五十忽焉至期頤方半駕其壽實  
天畀美意所駘蕩延年且無旣張皇養生主吾敢憚辭  
費



論詩示天嬰

微尚惓惓苦未宣誰能慘澹徹中邊一從會得無絃旨  
不近琵琶已十年

落木空山獨鼓琴天風縹眇秋陰陰沈思忽到無人處  
未要時流識此心

人間颯沓有餘哀坐負嶽奇絕代才七寶莊嚴彈指現  
可堪無地起樓臺

太羹至味謝醯鹽玄箸超超衆妙兼不解品詩鍾記室  
卻將潘陸壓陶潛

刻骨清言轉益深苦將微思洩幽沈天吳紫鳳渾顛倒

未稱年年壓綫心

鉛華久已薄楊劉但有霜聲接素秋  
鶴背瓊瓏鉤鐐骨不煩露地載癡牛

振采猶愁骨不飛由來燕瘦勝環肥  
平生無限蕭寥想流派何關呂紫微

窈窕孤吟發大哀上天下地一低徊  
虛荒誕幻離騷意錯被人呼作鬼才

盡取纏綿迴澹宕要收戔削入風華  
燕支十斛從渠買不寫徐熙沒骨花

象外冥搜徹九天眼前景色赴沈繇  
嵯峨蕭瑟詩人意

合在平陵積水邊

中聲臺閣備宮商  
山澤微吟敢抗行  
遺世羊裘甘寂寞  
不從龍袞較低昂

嶙峋白雪號奇才  
落日西風字字哀  
諸將詠懷皮骨盡  
可須吞到杜陵灰

宛陵清峭異廬陵  
萬古歐梅各著稱  
冷抱熱腸蘄嚮別  
那將赤炭置曾冰

漁洋意盡邢石臼  
甫草情深謝茂秦  
自古詩流例相念  
談龍嫚罵又何人

苦吟意象極孤清  
遠有蟠天際地情  
眼底佳人徐孺子



解搜險阻出光明

徐句羽論詩詩云漸知詩律非容易若與禪機互往還辛苦直窮幽渺外

合離似在有無間冥搜忽忽光明境遠陟重重險阻山蟠地際天一疏散人生何事更相關

義疾沈縣絕可哀百身無術贖方回嘔心未盡平生意

粉碎虛空惜此才

謂應叔申

索索絃聲十指乾自尋商調背人彈微茫意思君能解  
招取空山共歲寒

返里視叔申疾爲舉誦余嘔心未盡平生意一絕

叔申潛焉出涕因曰子真知我者行當以著作相

託自問所詣不止此今止此命也子他日必爲我

刻繩而嚴刪之余悲其意賦一詩以申前旨

迂辛短李各翩翩我自低徊念子賢直欲嘔心空四海  
坐看縮手了千年平生已分才爲累抵死猶悲力未全  
絕世鳳皇好毛羽漂搖相對倍堪憐

用前韻

四方上下各騰翩從事篇章子獨賢落筆能追元祐腳  
含情悽似永嘉年奇才暴物天應罰苦語傷心策未全  
東野詩窮昌谷妖是人寧不解哀憐

疊韻卽事

不妨卿自用卿法何至操戈戾兩賢豈謂譏彈煩敬禮  
真成嘲諢敵延年陽秋皮裏鋒能試柴棘胸中量未全

疊疊逼人聊復爾申申詈予政堪憐

與佛天論詩不合致相齟齬張蹇叟美翊貽書解

紛賦詩報之

今古才人總不天每傷氣類一潜然蹶邛同命應相惜  
蠻觸紛爭亦可憐且復薑芽斂余手不容雞肋當尊拳  
一言願奉王生教努力靈均惜誦篇

聞叔申病篤旋里存問至則已逝矣撫尸哭之

忍死都難一昔留臨尸慟哭此生休相看燭暗堂深地

遂到山頽海涸秋性命真成虞不臘

春間叔申自上海返里就醫問余曰

醫言云何不臘乎將不食室家遑恤魯無鳩眼中掩抑

新乎其病中整暇猶如此



無窮泪今日堂堂爲汝流

哭應叔申

天以子授我我命實子託取子於我懷何乃殺之速冥  
契今已逝百身莫可贖而我猶爲人生是遂使獨旣失  
左右手且復斷其足已矣吾喪我恆幹將安屬

腹中所欲言手寫子能到子有竊窕心我亦穿其竅方  
寸出秋月虛明耿相照知希互自貴六合有微笑死生  
忽契闊臣質遂凋耗蒼蒼非正色胡取天之毫文章關  
性命子死疇我好拓天積奇痛星日慘不耀千秋萬歲  
情寂莫徒自悼

子詩多苦語每挾清霜飛秋聲在肺腑刺促能造哀一  
語百含咀始是終自非旁皇求其適刮腹窮深微少作  
盛凋籤唾棄等沙泥惜其所詣精轉掩槃槃才神魂死  
相付子意吾知之肯以小小瑕玷此片玉姿拔竒得妥  
帖撥翳翹殊尤孤光迴不滅照眼生悲唏

YORK UNIVERSITY

JUL 03 2001

EAST ASIAN STUDIES

回風堂詩卷二





回風堂詩集二





